

A Monthly Christian Magazine

AN ORGAN OF THE ZOU PRESBYTERIAN CHURCH SYNOD


Khristian Tangkou

ယဉ်ကျေးမှုတံခွန်

တိရစ္ဆာန်များ

Vol. 61 || No. 7

July, 2025



Editor: Rev. Dr. Hangpi Manlun

Synod Kumpuon

Khrist Jesu a um Lungsim

[Phil. 2:5]

Khristian Tangkou

Vol. No. 61 || Issue No. 7 || July, 2025

Editorial Board

Editor : Rev. Dr. Hangpi Manlun - 9862910875
Joint Editor : Rev. Zamlianpau - 7629978067
Cir. Manager : Upa Jamsianmung - 9862086615
Bus. Manager : Nu Niangkhanmang - 9863934719
Nh. Suanneiching - 8787790520
Nh. T. Naomi Goulianching - 8413854088
S. Joel Lianmang Zou - 8729906706

Cont. Editors : Rev. Awnkhanhup - 9383114081
Rev. Khupsianlal - 8974749874
Rev. Lamsuanthang - 7005723755
Upa Khaiminlian - 9612479417
Upa Khupsuankham - 9863193371
Dr. S. Thangboi Zou - 9862754101
Upa Thangzasuan

ZOU SYNOD ULIENTE

- **Moderator:**
Rev. Kaimuanlal
- **Moderator Elect:**
Rev. Khamminlian
- **Secretary (Sr):**
Upa Kapkhanhau
- **Secretary (Jr):**
Upa Khaiminlian
- **Treasurer:**
Upa Thangchinpau
- **Statistician:**
Upa Dongzapau
- **Executive Secretaries:**
Rev. Dr. Hangpi Manlun
Rev. Zamlianpau

Copies - 1200

AMAN

Kumkhat ah	- Rs.	100
Post ah	- Rs.	200
Copy khat ah	- Rs.	10
Life Member Fee	- Rs.	1,000
Patron Member Fee	- Rs.	2,000
Memorial gift	- Rs.	2,000

A sung thu

- Editorial..... 01
- Thu tuomtuom & Thumpi ding 05
- Belam chin a hing ching..... 06
- Hagau a piching..... 08
- Nu leh Pa mawpuohna 11
- Pasian dihtatna sui masa un 16
- Mittui luong kawm a haichi tu..... 18
- Suunna..... 20
- ZPWF Column 21
- ZPYF Column..... 23

Thusuo zosie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



PASIAN SUM NEGHUH NA (CORRUPTION) ZAUHUOI DAN SUINA LEH KIKEP SIENG DING DAN

Thumapui.

Awle ithupi uh, ‘Corruption’ ichi chieng un ilungsim uah sum-le-pai nehguhna lam maimai hiding in igingta paimai uhi. Ahin a aumzie, dihtakah khun tambang chau ahisih a, ‘thuneina zahkhielnate, midangten atanding ua kilawm atan lounate, mani bawldingte leh mani bawllou ding tanpha vabawlnate ban ah dihloutah a sum-le-pai munate khu corruption’ chi’n a huopthei ding hi. Tualeh corruption hamkam khu eima ham-le-pau bang mai-in i mangta ua, eiham a lekhieh ding hitaleh a lenadih tah theisiem ahamsa mama hi. Azieh ahileh ipu/ipate mi gin um leh siengthou ahizieh uh ahingei ding ua amau hunlai in nakijang tamlou hingei ding hi. Tuaziehin, eiham zanglouin Sapham a ‘Corruption’ chi’n izangtou ding uhi. Tualeh i Bible uah zong corruption chi kammal 80-vei val atuong a, tuate khu tahsa-le-hagau susie thei leh Mangpa lah a dihlou tah a khawsahna leh a dan jui utlou mite genna ahideupen hi.

1. Bible a Corruption thu imute uh isui masa ding uhi.

1.i). Adam leh Evite nehguhna thu.

I Bible i etleh Genesis ah Pasianin Adam leh Evite nupa kung ah ‘sia leh pha theina sing ga khu nelou ding in thu apie’ hi. Ahin Setan thumang in nehrou ding sing ga anehtah ziehun, khawvel ah khelna alutta a, tuni dong in ei asuon-le-hahte uh mikhiel ihilawthu uh imu uhi. (Genesis 3). Tualeh Evi leh Adama’n nehrou ding anehtah ziehun,

Pasianin ‘action’ a langal a, Eden huon apat a ‘notmang’ ngal mai hi. Tami a kipatin nehguh tah guhna pen Pasian toh kikhenna ahidan imuthei uhi.

1.ii). AKan nehguhna thu.

I Bible uah Joshua 7-na ah, Israelte Joshua lamkai a galjawna nasatah aneitou laiun, gingatloupi in Ai khu neunou khat ajouta sih uhi. Azieh ahileh Akan in lahlouding a Pasian in achite analah tah ziehin Israelten guollelna leh muolphou nasatahmai a tangua, mi tamtahn zong ahinna uh atanlaw uhi. Tam Akan khelna khu Pasian in Israel mipite khelna bangin asim sah a aguol lel law uhi. Tami a kipatin mikhat nehguhna khu innsung, chi leh nam, gam leh nam a ding a ngiem kiehna leh shinatanpha tuntu ahidante jong imuthei uhi.

1.iii). Siempu Eli tate nehguhna.

I Samuel 2-3-ah Siempu Eli taten Israelten maitam a kithoina ding sate Siempute nehdingte akineh ziehun, Pasian alungthah a a innsung uah Pasian lungthahna/hena tungin a hunlouin ashilaw uh a zong asiempu hina uh zong abei lawta hi. Tamna kipatin nehguhna khu tahsa-le-hagau a Pasian samsietna leh khanggui tantheina ahidan jong imuthei uhi.

1.iv). Israelte lengpa/kumpi masapen Saul dihtatlouna.

Tami jong 1 Samuel 15-ah imu uhi. Pasian in Kumpi Saul khu, Amalek mite dou a thatlum sieng ding a thu apiehlaian, Saul in thumanglouin lahlou ding, belam, bawngtal, bawngtal leh a lengpa/kumpipa uh Agag nasan ahing in ang kai ziehin Pasian in akumpi hina akipatin apaimang hi. Lahlou ding leh thalup sieng ding a Pasian thupieh a zui nuomlou ziehin Pasian in ataisan atop ah ama-le-ama akithatlumta hi Tamna kipatin nehguhna khu atop a mani ngei adia sietna leh shitheina tuntu ahidan imuthei uhi. .

1.v). Elisha suoh/sila Gehazi nehguhna thu.

2 Lengte 5-ah Sepai sap lien Naman in aphahna Jawlnei Elisha thupieh bang a Jordan lui a sagivei kiphum a, suhdamna atanlaiin kipah etsahna in Jawlnei Elisha kung ah silpieh apiehsawm lai in ala ut sih hi. Ahin, a suoh/silapa Gehazi in enla in aguh in avanuadel a, kapuin dangka talent khat leh kihenna puonsil ni, hing pie in ava chi hi. (tang 22-23). Tami thu Elisha in atheitahin hamsiet in, “Phahnain ahing man ding a, kumtawnin nahah, nasuonte zong aman zel ding” achita hi. (tang27). Tamna akipatin anehguhna ziehin ahah asuonte tanphain phahnatna

aveilaw uhi. Tunin zong nehguh/tahguhna ziehin Pasian nnasem tampite jong hagaulam a phah tamtah iumta uhi. Tami gawtna khu eikhangmai a beilou a itukhang itakhang a apap ipuohkhah ding a zau huai mama mai hi.

1.vi) Juda Iskariot nehguhna thu.

Juda Isakriot in Mangpa Jesu khu zuohin, Siempute kung ah dangka 30-daplahin amansahta mai hi. Ahin atopin akisia mama a, A sumte khu siempute kung ah avanuapekia sawm a, amauten lah deilouin, ‘mikhuolte kivuina ding hanmuol leina in ajangta uhi’. Atop in amapa khu akikhailum in vanlai jawl ah agilpi apawh kehta hi. (Nasepte 1). Tami akipatin nehguhna khu inehlaitahin nuom ding dan bang in kilang jong leh inehguhtah chieng in anuomtuon sih ding a, ama a dingin shina tuntu ahihinga mai hi. Tamtan a tunpi dinglam amathei hileh zaw hibangin agamta khawl sih ding hi

1.vii). Anania leh Saphirate nupa nehguhna thu.

I Lai siengthou Nasepte 5- ah jong, Anania leh Saphirate nupain jong agam neisa khat uh azuoh ua, akim khat akoidap ziehun Pasian sol/khem suohin nikhat thu in ahinna uh atanlaw uhi. Tamnah, atahtahin gen lei anehguh uh ahitahtah sih a, sawm-a-khat apiehlou ziehuh ahibou hi. Tamna a phuoldap uh sumte khu kon atangta diei le? Eiten zong Pasian zaulou zen a, inehguh/tahguh na tohinei igoutepi khu dachieng a ishisan mai ban uah rapture zou chieng a ding a gou khawlkhaw! isuohmai diem maw?

1.viii) I Mangpa Jesu ahan akipat athawkia nua golgulna thu.

Mathiu 28:11-15, sung ah Jesu khu shina zou a han a kipat athawkialain, galkap/sepaite kung ah siempu liente hing pei in Jesu pen athawkia hilouin sepaite ihmud kalin anauzuiten aluong khu aguuhmang ahi achina ding un sum tampitah apie ua, tuni dong in tami thu khu Judate lah tambangin akigen nalai hi. (tang 5). Tam atung a igente nehguhna hinkhuo namangte khu koima anuomsa leh kipah aum sih uhi.

1.ix). I Bible gendan in sawm-a-khat piehlou jong nehguhna ahi.

Pasian guoljawlna itan bangbang a sawm-a-khat pieh louna khu nehguhna chi khat ahi. Pasian in Malaki bung-3 ah, “Sawm-a-khat kei a ahi a chi a, piehlou khu ama guhsahna jong achi hi.” Tualeh Mangpa Jesu jong khawvel a lenlai in, ‘Kaisara sil khu kaisar a kung ah pie un achi

hi..., ‘Pasian sil’ khu Pasian kungah.....” a chi hi. Tuaziehin Pasian satan sawm-a-khat dihtah piehlouna jong khu nehguhna leh Pasian suomna chi khat ahithu i Bible uah chiengtahin imu uhi.

2). Pasian Hattuum sung a nehguhna (Corruption) thu.

Pasian guolzawlna toh i hattuumte u’zong khangtoug in mate i sawntoug zelzel ua, i budget-te uh zong a crore tel ahitheita hi. Ahin, isimmawna leh nuoisiena uh hikeilouin, tamna i sum mu na dingte uh khu atangpi in mi gin umte tuohkhawmte akpiat ahiua, tuate khu mi aahui mante, mi hawlhut mante, rekshaw hehte nithate, nikhuotha kilawte, meithai tagate apat leh mite nehtah sih hing kitoikhawm veuvoute leh adangdangte apat ahitangpi uhi.

Tualeh, i gensa bang un Solkal nnasemte gentahlou a hattuum leh hattuum lamkaite lah ngel ah zong nehguh/tahguhna khu abei dieh sih hi. Tualeh, sum-le-pai saitute khun isai khah nah pou leh nehthei leh nehding et a I etmaite uh zong silda umtah ahi hi. Pasian in sawm-a-khat peloute bawn guta ang chi leh igenthei/liengvaite piehsa suthelthang a negu ngamte khu Pasian ngai in migilou tungtuong leh huoisie vote ahiding uhi. Amaute ziehin, ginna a naupangte khun silpieh thadana aneilawthei ua, tuabang mite khu gawtna ding khu Bible in, “Angawng uah bu-gawi zanna suong gihpi khat awhsah a, tui lithuhpi sung a khieh ding” chi a agente u’khu a satanding uh hileh a kilawm mai hi. Tuabanah, Pasian in ‘Kei khu khangni khang thum a phuba latheitu Pasian ka hi a chi bangin in, eite nehguh/tahguh ziehin in itu/ita bangma theiloute tung a Pasian gawtna zong hingtung thei ahilam imanghil sih ding uhi.

3). Pasian sum na neguten mite sawlzou/khemzou nanle uh zong Pasian a sawlzou sih ding uhi.

Tulai khawvel pen a chalaklak, a bawlngam leh migilou a pilkhelte adingin tawmnou khat sung chetheina gam asuohta hi. Pasian sum-le-paite zong a negu nuom leh anegu ngamte a ding vang nehtheina ding lampi aum tham ding hi. Ahin tamte khun sawt adai het sih ding hi. Tualeh, auditorte isawlzou maithei a, ahin Pasian leh eima ikisawlzou ngai sih ding hi. Aumzie ahileh mihingte sawlzou nan lei zong eima-le-Pasian khu ikisawlzou sih ding uh china ahi hi. Atawmkim, igentalei Pasian sum toh van neitah lei a ta leh nau chawmte zong koima a kiutung aum ngingua sih uhi. Kikhang hilna pha ahi hi. Tuaziehin, Pasian sum inehguh leh ikituohpi ding khu a sum neipa Pasian ahimai ding hi.

4). Thukhum sin/topna.

I gensa bang un nehguhna khu Pasion poikhoina ahi a, nikhat nichiang in Pasion vaihawmna masang ah i dingpi chiet ding uh hi. Ei Khristian Pasion hing bête in tambang sildih lou leh suolte idou ding uhi. Tam a tung a igente khu koima mimal demna leh genna ahisih a sukhazousie in kei hing kigenna ahichin lathei lei a hoi mama ding hi. Mangpa'n simtu zousie hing guoljawlta hen aw. Amen!!!

.....



1. Pasion lungsietna leh mapuina toh July 2025 ha i tung kiata ua, tam tan hing puitu i Bieh Pasion mi phat in a kung ah lungdam thu i tut masa uhi.
2. Tribal zousie kipumkhat a, tup kibang a, a tawp tanpha tuibang i luonkhawm ua Saperate Administration i mu theina ding un theitawp suo in thum va ui.
3. Meitei apat tuomkhen in i umta ua, i gam buoina toh kisai a Lamkai tuomtuomten kituoh tah a vai a hawmkhawm theina dingun thumpi chiet va ui.
4. India gam sung mun tuomtuom a Khristian te soisahna gen ding um zel ahina ah, Pasion venbitna zal a i Pasion uh i bieh ding dan tah ua i bieh thei ua, Manggam i kehlet theina dingun thum zom zel va ui.
5. I gamsung a buoinate a hing ven a, hindan ngaina i zah thei kiana dingun bangkim bawltu Pasion kung ah chitahtah in thum chiet vai.
6. Pasion lungsietna tang in guotui a hoi kiet mama a, i haichite uh Pasion venbitna toh tui tah ne thei ding leh Haitha Pawi Pasion

lungtuoh bang a lawm thei ding in Hattuom mipite deisahna sangpen i kipie uhi.

6. Tu kum 2025 Synod kumpuon ding “**Khrist Jesu a um lungsim**” (Philippi 2:5) chi ahi dungzui in i lungsim khu Khrist Jesu a um sah in ama kipuisah sawm chiet ding in simtute zousie Pasian min in i kichiel uhi.

7. **Zou Christian Musical Committee** in theitawp suo a sawttah ana buoipi uh **Zou Khristian Labu** (Labupi leh Latha Bu kithuo) Synod Khawmpi 21veina in a phasah bang in Swapna Printing Works ah Copies 5000 sut zou ahia, tua ahi toh kituoh in Synod Office Bearers Meeting phasahna bang in ZCMC ah tut tou ahi. ZCMC Committee ah May 30, 2025 in Rev. Thangliankham, ZCMC Chairman in Pasian kung a latna nei in hawmkhiet ahita hi. Copies 5000 khu hawmguol ahia, ei Zou Synod in Copies 2000, MELC in Copies 2000 leh ZCBC in Copies 1000 chia hawm ahi. Tam Labu khu tu in Synod Office ah Bu khat ah Rs. 300 a lei thei zing ahi. Tam tan hing puitu Pasian kung ah lungdam thu gen in a tam thei bang lei ding in i kingen uhi.



MANGPA KHU BELAM CHIN A HING CHING PA AHI

*By:- Upa Tualkhanpau
Tuibuang*

Tam Late 23-na pen, a kithei chiet pen, akidei chiet pen zong ahi. David in a naupan lai in belam ana ching a, ahing pichin bep in aneulai a a belam chinna asil tuohte a pat in tam Laa hing bawl khie hi ding a gintat ahi. David in Mangpa muong zou mama ahi ziehin, muon zawna Laa zong kichi hi.

Mangpa khu belam chin a hing chingpa ahi, bang chi banga achin adiei, Pasian a kipat bang anga adiei enva ui.

- i). Tahsap bangma neilou hi ding ahi.
- ii) Louhing dipdepna mun ah akhawl dam sah a,
- iii) Tui hing dum kihkiah mun ah azawpi jel hi.
- iv) Ahinna abawl hoi pieh jel a,
- v) Dihtatna lampi ah apui jel hi.
- vi) Shina limguom tawn in peinanleh sil gilou mawng mawng azausih hi.
- vii) Belam chingpa Mangpa toh a umkhawm uhi.
- viii) Mangpa khetbuh leh achieng in, belam ching pa lung muonna apie hi.

Tam thu guol giette khu Mangpa'n belam chingpa kung a apieh ahi.

Belam chingpa'n ama'n belam achin bang a eite zong Mangpa'n hing ching ahi achi utna ahi. Mangpa'n eite zong i nasepna pat in i hinkhuo i kalsuonna ding ah hing pui a, hing panpi a hing ching a hing guoljawl ahi.

Taang 5,6 ah, belam chingpa lametna leh kinepna tam bang a mu thei ahi. i) ahing doute mitmu in ka masang ah ann nang lui a. ii) ka lu sathau na nu a. iii) ka nou adimlet achi hi.

Tuama bang in buoina atuoh chieng in tam bang in agen hi. i) pellou in hoina leh zangaina in ka damsung teng hing zui ding a, ii) Mangpa in ah kumtawn in ka teng den ta ding achi hi.

Mangpa'n belam bang a achinten anga ding aluo ding uh bang ahiei ichi leh Mangpa inn a teen ding ahi. Mangpa muongte tan ding agenna ahi.

David tam Laa in ama leh ama khamuon a, kipahsah a, akipahna in atha atungsah hi. Tuachi'n Mangpa inn ah nuomtah in ateng ta hi.

Eite zong David bang in Mangpa i kikemsah un, i lung muongna uoi kingaituo va ui. Mangpa mai ah puananlei, i khelnate thupha tawi in Ama nailei hing ngaidam va'n tuachi'n a innpi ah kumtawn in i teng ta ding hi. Pasian in athu guoljawl taken. Amen.

.....

H agau a piching hinkhuo

Eph. 4:13

By:- Upa Khupsuankham

Cont. Editor

Thumaui:

Piching hinkhuo khu pichin lam (into-prepection) imaw ding uh chi in khanthei tan a khang a, khanglien a hagau a piching hinkhuo zui ding a, suon leh pah neithe i ahi. Singkung zong a pichin chieng a paah a ga anei hi. Tuabangma in hagau lam ah zong a gathei a, a ann neh zong ahoi a, ahileh khanletna leh pichinna hinkhuo in a zui a, thahatna in azui nalai ding hi. Hagau a piching hinkhuo ahileh sil zousie ahun zil a hun man a thu zil a thu gen thumna sillat khat phot tomkim a ahi bang dan zil a ahun in ahuop sung a gensiemna khu hagau a piching hinkhuo ahi.

1). Piching hinkhuo khu lamni a genthei ahi. Tambang in:

Mihingte i pien a kipat a nu nawitui toh kikhen thei nailou hun sung khu neulai hun sung ahia, kum 18- i chin chieng a piching a ngai ahia, piching hinkhuo zil tou zel ding dan a manaw ding dan tambang in en vai.

- Neulai hunte nuasie theita -
Innten-louten dan theita - Zi tate leh tute kem ching theita -- Nu leh paten tamel muta - Shi ding ngah a hun man hun - Kipumkhatna leh - Ngaidamna hauta chite ahi.

Hagau lam a piching hinkhuo khu (Heb. 6:1)- na sung i et leh Khrist thubulte sutsut non lou in piching lam naw zaw vai chi i mu ua, nasepnate suonglou a shisan a “Hinna thute, baptisma thute khutngapna thute leh mishi

thawkina thute leh pientha lai a i kipahnate uh a buolbuol non lou in piching lam manaw ding a thumop ihi uhi. Khrist thubul (Principles of the doctrine of Christ) ahi.

Tua khu tapidaw ihi chillai a hundamna itan theina ding a Khantan hoi hing kihil masate khu nuasie a malam naw ding a thupieh ihia, tua khu hagau lam dinmun a i pichin na ding ua a (foundation)- ahi. Etsahnan mi khat inn lam ding a kisa a, a inn lam a det theina ding in foundation lemlem henlen aban zopta sih leh a inn khu inn piching leh dettah (Pucca building)- hithei lou ding ahima bangin ei tapidawte zong theina leh hepina lam a i pichin sih leh hagau a piching hinkhuo ah i ding thei sih ding uhi (I Kor. 3: 11, 15; Eph. 2:19-22; II Pet. 3:18).

2). Hagau lam hinkhuo khu tangbang in gen vai:

- Khanglai hisung a Pasion thei - Hagau nawitui ngai nonlou - Nipi sang a khanglienta - Hattuom dan a ji leh ta a kineita - Hagau lam a tate khangsang zouta - Singlamte tung a shipa (Jesu) gingta a pomta - Mawpuohna theita - Midangte dia hing theita - Bible sim zing theita - Pasion thu gen a gingtute piching sahta - Pasion a kipawlkhamna houlim theita - Mite etton thei ding a um theita hi.

Piching leh hagau mitna a kibang khol sih a, pichinna pen kimawh ngah theilou ahi. Pichin zou nua chiengin a kiem thei in a nua bei thei non sih hi. Puteh khat naupang a suoh kia thei non lou bangin, Hagau mitna pen kipiehzouna ah aking a, akipieh zou sih leh tahsami kisuoh kia thei veve hi. Singkung amaw loup a amaw mihing leh ganhingte zousie pou in, gaw in, suoh in khang semsem a, piching in a gasuo ding a, ama bangbang a piengsa kia thei hi (reproduce) ding a, Pasion in ang siem ahi. Hinanleh a khangkhiel ki-um thei a, zahtheilou pawl um hi. Ka mel thei mi khat, alutang maimai khang in a khut, akeng leh atahsa dangdang khang theilou in um hi. A lutang gawl ahiman in a tou in zong a din in zong a lutang in a lepta gige ahiman in bangma khat

in zong akimang thei non sih a, a kipa paipai hi. Nasep um ngellou a theina atam seng chieng in lutang khangkhang a tahsa dang khang lou toh kibang ahi. Pieng suollou in theina leh sepkhietna toh kiton a piching na kisam hi.

Tami Lai siengthou thupen piching lou uh ahiman a, kigiel ahia, i piching theilouna san khenkhatte: Adieh in eite a tamzaw i thei tam in, i theichien tawm taluo uhi. Gentenan, nambat 2- ingah thei na ding in $1+1=2$ i gawmleh 2-ahi. Tuabang pen a dihpén ahi chiin ngaidan nei pawl bang ki um hi. $3-1=2$, $5-3=2$, $100-98=2$ chibang in 2-i nga theina ding hi. Lampi tampi um ahi lam imanghil uhi. Pil mama na pin Pasion zahlou a Pasion nna sem tampi um hi. Mihing lam apat pilna theina ah muonhuoi mama isa a, hinanleh pawng deisah hang in Pasion hatna (calling)-tangloup i a izah vang in Pasion in ama pa/nu zang khalou hi. Tuaziehin asejna pawlpite (Mission)-khu hagau lam ah vangsie hi. Pasion in asejna atheipilou zieh in.

I theina atawm seng ziehin buoipi tahlou leh a buoipi huoi lou pipite khu thu neu nounou khu thu isuo ua, i buoipi khathe hi. Gentenan Liliput mineute gaal kidouna thu galipa in a vadot leh Ahtui ang suhkeh didan zieh a

kipawng sel uh ana hikha hi. Mimal hinkhuo leh Pawlpi vaihawmna ah a poimaw (important)- leh thukin (emergency)-thu khu a hoizawpen e chi i thei khel kha ding a zauhuoi hi.

Heb. 5:12-13- i etleh Pasian bieh ding dan leh anasep ding dante buoipi a, hinanleh Pasian thutah kigen chieng a lususu mai a nawitui maimai ne thei giap mi pawlkhat um hi. Nupi nauneite mabang a thuahpeh leh malta ahisih leh zatepvam maimai nete mabang a hinkhuo man khu a piching theisih hi. I pien kum 40-70 kikaal bang hitanapi biehin kai chiengin nausen nawitui tepnate keng in tawp gige talei ita-inaute khun mi lah ah khodah ngamlou ding uhi. Tuamabang in i pichin tahtahna ding in ann gum, Laisiengthou thutah ma i lunggul ding uhi.

Imuna leh i theichetna atam semsem leh kei china tawm semsem ding hi. Greek mipil Socrate in, “Bangma theilou a kingaite pen mipil ahia, bangma zousie thei a kingaite khu mimaw” achi hi. Jesu theichien semsem lei ‘KEI’ china kiem semsem ding a, Jesu khu lien deudeu ding hi. Ei i letsawm semsem leh Jesu neu deudeu ding hi. Khantanhoi Johan in Jesu en kawm in, “Ama lien semsem in kei ka neu semsem ding

hi” ana chi hi.

Mittaw mi 6- saipi thamte khu amau thamkhahna mun chiet uh dih asa ua, a tahtah a kichetna ding in a mitte uh vah henlen hileh amudan uh akichien zawsem ding hi. “Ken a kung a tui dawn ding a ka pieh khu a dawn kha tapou dangtah kia nonsih van in, asung ah hinna tuinah hing pul tavan, kumtawn hinna neita va” (John 4:14) na ah achi bang in. Ei tapidawte zong iga khu bang ata diei ichileh, “Ki itna, kipahna, kilemna, thuohhatna, zainemna, hoina, gi-umna, nunnemna leh kidehtheina” ahi (Gal. 5:22-23).

3). Iga hun uh khu bang hun a kilang diei ichileh:

- Mite huot a i um chieng ua, “Mite itna” nei hun ahi. - Daa leh lungkham, mangbang a i um chieng ua “Kipahna” a i um hun ahi. - Mite toh ikisiet chieng ua “Kilemna” inei hun ahi. - Genthei hasat ituoh chieng ua, “I thuohhatna” hun ahi. - Gitlou thangpai bawllai a “Hoina” inei hun ahi. - Solna leh sietna mun a i um chieng ua “Gin-umna” a i um hun ahi. -Min zahda ding agen chieng a “i nunnemna” i suhlat hun ahi. - Neh leh dawn leh tahsa utna ituoh lai a “iki dehawna” hun ahi. - Sum leh pai dihloutah a tampi ilah theina hun a “i hoina leh dihtatna” a idim hun ahi.

Ahuntah a iga theilou lai ua zong Pasian in ga ding adei ziehin “thuohhatna” toh ang ngah zing a, ang ngahlai a iga thei nai vaset louleh i khantanhoi don uh khu a gasuo thei namte kung ah pekheta ding hi. (Gen. 21;8) i etleh, Isak naupang khu ang khanglien a, nawi ang ngawl tah in Abraham in guolvahna annkuong thupitah in a bawl hi. Tuachiin nu toh kikhen thei nawi ngawl i tawm seng nahlai ua, hagau lam a piching hinkhuo a hing lou ihi uhi (II Kor. 6:18).

Tualeh, I Samuel bung khatna i etleh Samuel naupang tanchin imu kia a, Hannah (anu) in Silo khuo a apasal Elkanah

kithoi ding a, apei lai in, kei vang nau in nawi angawl masangsie in kithoi dingin ka peisih ding a, a nawi angawl chiengin ka pei giep ding a Mangpa kung a ka umden theina dingin achi hi. Tuachiin, anawi tep a tawp phet in Mangpa kung a piehkhiet ahi. Tuachiin nu toh kikhen theita naupang Samuel khu Mangpa masang ah nasem in a umdenta a, a khanglien hi. Tuaziehin, hagau a piching ihi. theina ding un atung athute lungsim a chitahsuohna toh ngaisut a, tahsa a piching ihi bang ua, hagau lam a zong piching hinkhuo ihi theina dingun kingaisut chiet dingin ikichiel uhi. Mangpa’n simtute zousie ei guoljawl taken.

NU LEH PA HINA LEH MAWPUOHNATA TATE TUNGAH

- Rev. Dr. Hangpi Manlun

Awle, i thupi Nu leh Pa Mawpuohna Tate Tungah chi khu tulai igam dimun et in I kul leh poimaw mama khat uh ahi jieh in thei leh theilou thu hilou in I phattuompi khah ding uh lam etna toh ka hing gel ahi jaw hi. I thupi ua I lut maang in Nu leh Pa hina igen masa ding uhi.

1). INSUNG A PATE MAWPUOHNATA.

Pasal chi khu saphamin “husband” kichi khu Anglo-Saxonte ham aptat lah ahi a, a umzie khu ‘kikan khomna gui or inn enkawltu’ chinate ahi. Aumzie khu inkuon sung enkawltu leh kankhawmtu china ahi hi. Ahin tulai pa tampite khu ahina uh mawpuohnate uh alua zousih ua, adahuai mama hi.

Clyde M. Naramore in “Pasalin adamsung a bawlding pen khu Khristian innkuon bawlding ahi” achi hi. I Bible ah Vaihawmte (Judges) laibu khu lungkhawm huai tahin atop/bei hi. “Khum hunlai in

Israelin Kumpi/leng aneisah uhi” chi in. Jehovah alengpa dinguh hinanlehzong angaisah sih ua zong a nuol uhi. Tuajiehin innsung, gamsung ah buaina a tuoh uhi.

Tuabangdeu in tulai a US a hawten agen pen uh khu leitung a gam khangtou pen leh Super Power hizongleuh “Pa neilou gam” (Land of the Fatherless) ahithu uh ahi. Alaibu gelte uah zong aha gen mama ua, “ Pa neilou America”, “Pa neilou khang” chi leh “I pa mangthaite uh sui khia va ui” chite ahi.

Eilah ah ahileh paten khamthei guithei jieh ashisan a innsung mite ahi. Tuakhun innsung buaina leh sietna tunlaw leng hi. Colson in tambangin agen a, “Sildang bangma’n innkuon dinmun aluozousih ding, inkuon aumsih leh tate’n hinkhuo bawlkhiehnad ingin kingahna anei sih ua, inkuon tellou hindan ding theisih ua, ahinkhuo uh puitu ding khu amau sa utna leh noptatna ahi mai hi” achi hi.

2). PA INSUNG A HAGU LAM KAITU AHI.

“Pa” chi ang pienkhiahna hi agen uh khu ‘nung zanggu’ chi apat ahi achi uhi. Tuajiehnin Pa khu inkuon khaitu leh suhattu pen china ahi. Tualeh Khristian

innkuon sungah paten mawpuohna lienpen atang uhi. Tate in apate uh apatin Pasian lim (Image) amu uhi (I Kor 11:3, Eph 5:23). Tualeh America gam a lungsim lamsiam (Psychologist) ten naupangte adiingin nu leh sangshieta (Awizate) sangin “etton ding, zatat diing, thudoh diing leh puitu ding Pa loupi, migitna leh nunnemna toh mi kemding i kisas pen uh” achi ihi. Baibulin zong Pa khu innsung enkawltu leh vahtu leh kembittu ahi chiin ang hil hi. Tuajiehin Pasian in pate khu hagau lam mawpuohna sangtah apia uh achi hi. Pu Billy Grahamin pate kungah tam khu kang dong hi. “Nichinin innkuon thumna na nei zing uai? Na ann neeh ding chinin nathum zing uai? Tamte bawl dingin Pasianin Pate kungah mawpuohna ang pia a, Pa pen khu insung ah Pasian ban a mawpuotu ahi. Tamte na bawllou leh na bawl khial uh china ahi. Bangchi chieng ahiai in Pasian in ang dong ding hi” achi hi.

Tualeh Pa khu tahsalam chi hatu ahibangin, Hagau lamah zong chi hatu ahiding ahi. Novain a innsung mite hundamna Long (Tembo) sung a apuilut bangin, Paten izi leh tate hundamna Longpi Jesu Khrist kungah ipuilut ding uhi. Lengpa Hezekiah bangin i innsung chiet isutup ding uhi.

Pu Joshua in “ Kei leh ka innkuon piten Mangpa na bou sem vangun” achi bangin ei Nu leh Paten i innkuon ua Pasian na iseptheina dingun pan ila ding uhi. Leng David in a khuo leh tuite a galten ana mat lain delleng ka pha lai diai? Achi bangin, Setan henkawlbud itate leh tute thumna toh del diingin ikichiel uhi.

3). PA IN ATA LEH NAUTE KHU ATHUNUN IN A MAPUI DING HI.

Pa in thununna dihtah in a innsung ah vai ahawm ding hi. Siempu Eli in atate a etkol zoulou jiehin Pasian lungthahna a innsung uah atunga, nikhat thuin Hophni leh Phinehaste a shi uhi (I Sam 3:13). Tuabana a siempu hina zong midangte kung ah piehin aumta hi.

Tua banah leng Davidin zong atate a etkawl hoilou jiehin a innsung ah buaina leh namsau in vai ahawm hi. Atapa Adonija khu a kungah ahel a, Absalom khun adou a, tualeh, Amon khun asanggam nu Tamar khu suntangpiin asuom/ luppi ta hi. Buaina, kana, mauna leh muolphouna nasatah khu a innsung ah atun law hi.

Tualeh pa khun innsung ah atate enkawl ding dan feltah leh hoitah anei ding ahi. Pi P. Lianggengi in Mivom pa (Negro)

khat tanchin atate a etkawl dan agen hi. “ Ama pa khun ta nga anei hi. Atate hunzah ding dan sing peh (blackboard) khat ah tambangin agelsah hi. i.) Zingthaw hun ii). Laisim hun iii). Nasep hun, iv). Zingthaw hun, v). lawmte toh kipawl hunding leh in zot hun chite agelsah achi hi. Tamte khun adahkal toh agelsah a, a anneeh dingdan uh zong agelsah” achi hi.

Tualeh pain atate khu nasep ding danzong ahilin amapui ding hi. Judate’n “Pa in atapa nehsuidan (trade) ahilsih leh guata dingin ahil china ahi” achi uhi. Pu Jakobin atate khu belum chin ding dan ahil hi (Gen 40:32). Tuabana Jebedaiin “ atate khu ngamatdan ding azilsah hi. Joseph khun atapa Jesu khu singna (Misitry) sep ding dan ahil hi. Tambang khop nasep sil bawl ding dan kihil leh zilsah ahijeihun Judate khu sum bawl na (suina) lam ah Nam lawhching pen leh kitoudel pawl khawvel pumpi theiphah nam ahi uhi.” Tualeh “koizong nasemlou khun ne zong ne da hen” achi uhi. Tam khu tuni donga a dan dangka tahuh (golden rule of work achi uhi).

Ahin tulaiin vangsiet huaitahin pa ten tate khun tahsa leh hagau lam a imawpuohna te uh isemkhe zousih uhi

4). NA INSUNG BANGCHI BANGIN NA NGAIKHOH EI?

i). Apoimaw masa pen ana ngaituo dungzuiin gual ding hita lechin- Pasian, Na sepna leh Innkuon, hoipen na masah sah ei? li). Na ngaihhoh pente bang chi bangin hunna pia eile? Na hun pieh dan ngaituo lechin nangaihhoh pen khu ang kilang ding hi.

5). PA GINALOU (CHAU) (PART TIME PA)

-Zi leh ta ngaisahlou zena sildang buaipihite (ITim 5:8) - Insung a bangma bawlnuom lou a mi innvela thanuom ma ma te a hi uhi. -Insung a zi leh tate kunga humpi nelkai bang a hangsan, mi lah a ui guta bangte ahi uhi. -Mahni zite tunga lungthah that, midang adieha nuthoite bula anemtah banga umte ahi uhi. -Insung kikhop, thumna leh Bible sim / Pasian thu lama zi leh tate puisawmloute.

6). PA TAH TAH (FULL TIME PA)

-Bangteng sanga zi leh tate mangaikhawhte -Mite laha hangsan, innsung a zi leh tate nel dia umte. -Insung leh mun dang a zong atha nuamte -Thuginalou leh mumalloute gena hun subei mangloute -Azi atate insung kikhop leh biehin a puite -Tahsa lungsim leh hagau toh inn a um a, atate lamkai zingte ahi.

7). NUTE MAWPUOHNA INSUNG AH.

Nute khela insung a pawimawh aumsih hi. Naupangte leh pate nangawn zong inn angton chiengun asui leh dohma sah penuh khu “Nute” ahi uhi. Tualeh Nu umna leh umlou leh afel leh fellou umna leh umlouna zong nasatahin a kikhia hi.

Thugentu minthang Billy Graham in azi Ruth Graham hinkhuo agen a “Ka zi khu mi kingai ngiam tah leh thum mi ahi a, Bible in nute umding dan ang zilsah zousie khu ahinkhuo ah bukimtahin aum hi. Tuajiehin, damlai vangam ahi mai hi. Ka zi in ahun tamzaw ka innsung ua umding khu a mawpuohna leh satanin a ngai a, naupangte etkawl khu Pasian nnasep dia mawpuohna pieh bangin angai hi. Ka taten Jesu Khrist amutheina dingleh kana sepna a ka lawchinna dingin theitop in ang thumpi zing” achi hi. Tulai nu tamtah sum-le-pai deina zieh a ta leh naute enkawl manloute toh a kikhie mama hi.

Tualeh Martin Luther zong a nu leh pate khu sakhaw mi ahiua, a neulaiin thusawm piehte, late, Baibulte a by-heart sah uhi. Tuachiin, Hattuum siemphatu ang hita hi. Tualeh Arrella tangthu geltu in numei naupangin anulungsietna

leh duatnate jieh a Pasian aum chi agintat thu khu kanu nang lungsiet jieh ahi achi hi. Anun tambangin agen kia a, “Keima a Pasian lungsietna panin ka tate khun lungsiettu Pasian khat thei ua, akhanlettheina ding uh ka tup leh lawchinna in kangai hi” achi hi.

8). NU LEH PATE THEIDING TATE KEPNA AH

a). Tate Duat khiel/Suolnate:

i). Adei uh leh nget zousie uh pieh somna. ii). Sum pieh zing nate iii). Agitlouna ziehua vuoh leh sat atuoh chiengva khem them thum. iv). Asil guh leh mute uh kipahpih v). Mitoh akhau chiengua ponghut vi). Nu amaw pa in atai maw a zep chieng khatin na gup./ panpi

b). Ahoilama Etkol Ding Dan:

i). Amauh ading a silhoi dingt bawlsah ding ii). Sum tang hilouin a kul-le-pawimaw te uh van aleisah ding iii). Aka chiengua, azauna ding ua siha leh ngeu chivel a sollou ding. iv). Thutah kisa apong phoh leh vuoh louding v). Undan hoite hil ding vi). Migensiet pilou a zong zasah lou ding. vii). Tate muna nul leh pa kihau leh kivuoh lou ding viii). Baibul sim, thumna lup leh taw huna nei sah zing ix). Tangthu hoiloute genpilou a, Baibul thute genpi ding x).

Sunday School leh Biehin kaipi zing ding chite ahi.

America gam Pastor minthangtah David Wilkerson in nu leh pa apat taimang khanglaite lah a Crusade aneilai in anu leh pateuh a muda na jieh uh tambangin gen hi.

-Nu leh pa kituohlou, kihau zing ahijiehun ahi - Thununna akhau luat jiehin umpeihlou uhi. -Milepchia, zu hai leh corruption leh a thugen uh zuiloute ahijiehun. -Phunhat leh gensiet ding suizingte ahi uh -Tate dawn man lou zena, amauh nna ngaisahtute ahijiehun, nungah/tangval tampiten anu leh apate kung uah um utlouin taimang uhi. Tamte zong nou nupa hinkhuo zah dan ahi ei?

9). Thukhum sin

Tam a tung a i gente uh ahileh Nu-le-paten a tha a ngaituo in I din mun u’leh mawpuohnate uh i zouna uoi chin ikivelpha zing ding uhi. A khente vangsiet na ziehin in I tate uh tung uoh i sepding leh pui ding bang tah a i pi sih uh leh zong i tute tuong beh uah I pantha ding uhi.

(Note. Tam thute khu sermon type a kigen ahiziehin a sources or referenes ka hing tahlang sih a simtute kung ah ngaisiem ka hing ngen hi).

PASIAN DIHTATNA SUI MASA UN

By:- Upa Thangzasuan
Vaal Veng.

Thumapui

“Tuaziehin, bang ahiei ineh ding? Bang ahiei idawn ding? Bang ahiei isil ding? chi in lung himaw sih un, aziehpén tam silte na tul mawh hi chi napa uh Van a um in a thei hi. Hinanleh Pasian gam leh adihtatna sui masa zaw un, tuachin tam siltte zousie piehbe nahi ding uhi”. (Mathiu 6:31-33).

Pasian dihtatna chi ka hing tel hi, ka thei phahna tantan ka hing gen ding hi. Amasa in, mihingte dihtatna, Mathiu 5, “Midihtatte ahampha uhi”, ana chi hi. Tuaziehin, idihtat zou pou leh eima ma hampha ding ihi uhi. Midang in hing hamphatpi lou ding ahi. Tuaziehin, dihtatna pen chilbawl vot lou ding ahi, midihtat te lei ah zong adamsot ut mama uhi. Tua guoh hilou in avang uh zong apha ut deu uhi. Mi zatatna amu ua, nuoisie thei ding ahi sih uhi.

Hinanleh Pasian a dingin mihingte dihtatna khu apanna ding aum sih hi. Bang zieh ama? ichi leh dihtat i ut na lam uah zuau thu ina gen law ua, bawllou ding ding ibawl lawzaw sop uhi. Tuaziehin Pasian a dingin apanna ding aum sih hi. (Job 22:2)- i sim mawng aw leh mipil ama a ding a, aphattuom bangin mihingte Pasian a dingin aphattuom thei diei? Nangma dihtat ta leh chin bangkim bawlthei pa kipahna khat ahi thei diei leh? ahi sih leh na lampite dembei in koita lechin ama a dingin punna (met na) ahi diei? ana chi hi. Lungsim aphonng mama hi. Eiiite ngaituona toh aki elngat vot hi, tuaziehin i dihtat zou leh ei a ding lieuleu a phattuom ahia, Pasian a dingin

azahna ding aum kha sih hi.

Pasian gam leh a dihtatna sui masa un, tuachin na tulmawte uh kangpieh belap ding hi. Pasian dihtatna pen sil khat pou pou ahiding bangtah a isep a, ibawl leh Pasian dihtatna ahi. I tung a thu neite leh vaihawmte thuthu a um ding agen bangbangua, um ding khu Pasian dihtatna ahi. I mawpuohna suh bukim ding Zounaw lou ding, ngahla lou ding miten hoi asah teitei na ding a bawl khu Pasian dihtatna ahi. Tuabang mite kung ah atahsapte uh piehbe ding ana chiem hi. Sawltah Paul in Pasian thu agen lai in nikhat agiehpi pawl aum a, Hapta khat a taampi pawl a um a, hakhat aumpi pawl aum a, kumkhat atenpi pawl zong aum hi. Tuapen

ama ut ahituom sih hi. Pasion dihtatna toh asep zieh ahi, ei loipen Biehinn kai itawp leh nasuoh suoh suoh ua chin meikho zen a taisan khawmpi mang lei zong tuabang hi thou aki kholpi ngap a ki giehpai nap umlou, mishi aum le lah akivui zou leh taimang sieng aki henem ngap um lou akigiehpai ngap umlou kitai sansan te ihi uhi.

Kumpi David in Pasion dihtatna ana zatat mama a, tuaziehin Pasion in ahapna dingin khovel a, mipil penpen Solomon leh Israel te lah a nuolna bei a mel hoi Absalom ana pieh beh hi. Ka unau ngaitah te aw, kei zong tapa pil leh melhoi idei mama uhi. Tuaziehin itheitawp un lai izilsah uhi ichin, iha toh ipang ua, hamtapna ah ilan ua, ithumpi ua, imaupi uhi. Hinanleh Chief Guest a hatthei ding ipieng nai sih uhi. Ei sanga nam neuzaw tawmzaw a, ithei te zong milien, milal atasam non sih uhi. Bang zieh adiei leh, ama un Govt. na hoi pipi topsan in, Pasion na asem uhi, eiloi in pen Pasion nasep sangin sildang isem ut zaw ua, itawpsan zaw sop uhi.

Mikhat in, sil hoi abawl ziehin nam khat in minthanna atan ban ah, guoljawlna piehbe in aum hi. Tuama bangin mikhat in silhoi lou a bawl leh nam in minsietna atang a, guoljawlna ataan law hi. Tuaziehin eima dihtatna toh Pasion nna isep laisie angpieh be

ding ahapna itang ngai sih ding uhi. Khrist min a kaseppi unau ngaitahte aw Pasion nna isep uh ei a ding guoh hilou in i nam in guoljawl atanna ding zong ahi chi mangngil sih va ui aw? Sawltah Paul in hichin ana gen hi Rom 10:3, Ama un Pasion dihtatna theilou in, ama uh dihtatna suhdet tum in Paian dihtatna ah akitulut sih uhi chin in lungsim phong tahmai thukhat ana gen hi, thugen siemtah tah kisaten kisusieng un dihtat un achite uh Pasion a dingin panna bei ahi.

I ki thuhil dante uh dih non lou ahi, sawm-a-khat pe ngam lou sasa a, Pasion thu awi te ihi uhi. Pasion dan a koppi nei utlou sasa a, Pasion thu awite ihi giap uhi. Ka inn sahpa Mangkhup in Meiphu awi bangin Pasion thu awi sih un len, a ging in gingta un tahsang un achi khu adih ahi. Bible a thu kigente ahi bangbang a gintat ding ahi. Muon ngam ding ahi. Tuakhu Pasion dihtatna ahi. Ei ut dandan a isep e hoisah dandan a ibawlte ei hoisah dandan a igente Pasion a dingin panna bei ahi. Pasion dihtatna ichipen akul leh apoimaw na zil a sep ding zangiehpai ding houlimpi ding, hamuonna thu genpi dingte ahi. Atuachi sih leh sep leh seplou kibang ding aguoljawlna ang pieh belap ding pen ahapna mungai lou ding hi hang e guoite. Simtu zousie Mangpan theitel thei dingin hing guoljawlta hen, Amen.

MITTUI LUONGKAWM A HAICHITU DING

(Sam 126: 5-6).

- Upa S.K Khama

Thumapui:

Tukum 2025 Haitha July 27 Synod Calendar dungzui a bawl ding a guot ahia, deibang a Haitha ILOP THEILOU ZIEH UN mittui luong kawm a haichi tuding chi thu tomnou khat a isuo uh ahia, chitah suona toh Haitha laan a, lawm chiet ding in iki ngen uhi.

Bible sung ah mittui kigena mun tampi ah imu a, tuate zousie i-et chieng in chitah suona toh sil ingetna zieh a hithei leng ahi chi imu hi. Eima utthu a luonsah thei ahisih a, lungkham mangbatna leh puohnatna a hing kipan ahi. “Nupi shigalte akaa chieng in ahieng-asan laigil or a innsung mite ahi chieng in alai anaa a akap a ahitui uh aluong hi. Hinanleh lainatna neilou a amin maimai a kap poupoute a ding in chitahsuona panglou ahizieh in hitui aluon ding bang in aluong sih hi”.

Kumpi Hezekia damlou a a umlai in Amos tapa Guolnei Isai akung ah avahaw a, “Mangpan na natna khu damzoulou ding nahitah zieh in na innsung mite geltup in” achi leh kumpi Hezekia zong bang lam ngaa in akap hut-hutta hi. Mangpan Kumpi Hezekia kung ah na hitui luong kamu a nadam kum 15-ka belap chithu hilding in Isai asawlkia hi. Kumpi Hezekia dam kum kibelapna khu hitui luongpum a athum a, akaa zieh ahi. (Isai 38:1-

5) Nupi 2 in lou ahou ua, nupi khat pen in haichi atu chieng in Pasian kung a kilan vatehlou in atu a, ang pou a hinaleh hitui luong pum a kilanlou a atu zieh in akausan sieng a ‘Ga’ neilou in a um hi. Hinanleh Tapidaw nupi nun atun-akuon in Pasian kung a kilan zing in mittui luong kawm a haichi atu chieng in aga tampin apung hi. Azieh ahileh Pasian hitui luong toh atu zieh ahi.

Tulai J.E. (Japanese Encephalitist), Covid-19 natnate, Zunhum natnate, Cancer natnate leh natna hiileng tuomtuomte damna ding in W.H.O. (World Health Organization) in panla in Doctor siem tahtahten azen vang un adamzou tuonsih hi. Tamna igennuom pen khu Hitui luong kawm a kumpi Hezekia bang a chitahsuona toh ithumpou uleh bang tobang natna hinanleh a damding hi.

Sadhu Sandar Singh gilzang muotsa zong Pasian in adamsah hi. Hitui luongpum in thum poulei

bangdia damlou ding ? Jeremiah zong Guolneite lah a kahne khat ahia, miten Guolnei Kahnepa a chi uhi. Aman mite maban ding amu chieng pawnseng in thu agen a, thu agen vang in amiten angaisah sih ua, thu agen photphot chieng in akap paipai hi. Miten Guolnei kahnepa achi chieng in aman, “Ka lutang lui hihenlen, ka mitkhuh khu tuinaah hita maileh asun-azaan in ka kapkap ding” achi hi. (Jeremiah 9:1) I gamsung, ibielsung, i hattuom sung leh i innsung i-et chieng in Jeremiah bang a mittui toh buchi lultah kuonpi ding khu itasam uhi. Unau, nang in buchi bang nachi tu ei ? “Mittui khu Pasion mittui ahia, a kung a inget uh ngai hi”. Tuachin Mangpan ipoimaw ngaina toh mittui luong kawm a buchi lultah ingtuh thei hun chieng in,

Mangpan amu ding a igam

sung ah nungah-tangval, nupipapite khu kap kawm a buchi lultah kuonpi ding ang umta ding hi. Buchi ichi chieng in ithumna, ihuon haichite ban ah Hagau mangthaite lah a Khantanhoi vagenkawite zong haichi ahia, hitui luong pumpum a itu ding uh ahi. Tua khu Mangpa deilam ahia, guotui in leitang atapnou a, singte, loupah leh haichi leh mihing tanpha akhan ding bang a akhan bang in Pasion kung a hitui luong kawm a inget leh ilawching ding uhi. Pu/Rev. G.K. Samte alaa phuoh a ; “Thum poulei bang ding a lawchinglou ding” achi bang in ithum ding uhi. Hitui luongkawm leh kap kawm a haichi kuonpi a tuuten kipahtah in buphaite i-aatta ding ua, isana buphaite tawi in I Pasion kung ah ikilekia ding uhi. Mittui luong kawm a haichitu ding in ikichiel uhi.



Suunna:



Upa Kamgenpau

(L) Upa Kamgenpau khu (L) Pa Kaihenthang leh (L) Nu Khanzaching tate sawm (10)- lah a aguh (6)-na ahia, September 25, 1964 in Phaisat khuo ah ana pieng hi. 4th February 1978 in Rev. Thanglian ECC Pastor khut ah Baptisma ana tang hi. Nu Manniangching toh 1987 in ana kiteng ua, gil a ga goutan ta pasal 2 leh numei 2 a nei uhi. Tualeh 5th Febuary 1990 in MGP Mission Teacher in appointment pieh ahia, 1990- 2006 sung Sangshie nna a sem hi. 2004 in Zou Synod kimu a pat Zou Presbyterian Church Synod ah MGP leh MEP gawmkhawm ahia, 8th May, 2006 apat Zou Synod Office ah Accountant sem in 25th September, 2024 in Sr. Accountant apat in apension hi.

Lailam Veng Upa hi dingin 62nd MGP Session New Zoveng ah Upa Khuplam khut ah 5th November, 2017 in Ordination atang hi. Hattuum ah Mission Secretary in 2011-2013, LCC Secretary in 2014-2020 leh Local Chairman in 2024 a pang hi Tukum 2025 in a local uah KNP Supperintendent mawpuohna a tuh laitah ahiban ah MGP ah Statistician leh Synod Educatin Chairman a puoh laitah zong ahi.

Tualeh, 3rd June 2025 in damlouna ziehin Ideal Nursing Home, Tuibuang ah ki-ensah in admit in a um a, Doctor te advice bangin Delhi ILBS Hospital a va ki-ensah in, lam-etna a um tuonlou ziehin inn lam ah hing kile kia in Sielmat Hospital ah sun ni leh zan thum a um nua in inn mun ah etkol ahia, theitawpsuo a etkol hinanleh dam zouta lou in 23rd June 2025 12:30am in a tangtawn mun ding zuon in a it angaiteng nuasie in a hing muolliem santa hi .

Tualeh, dated 24th ni in Lailam veng hattuum inntehna toh vuina vaiguon a tenna inn ah nei ahia, local lieng ban ah MGP lieng ah Upa T. Kaizalam MGP Moderator in hahkhieh a nei a, Synod lieng ah Rev. Dr. Hangpi Manlun, Sr. Executive Secretary in hamuonna thu gen in, Rev. Kaimuanlal, Moderator in silpieh dingte piehna nei in Rev. Thangboi Khuongsai, Bieltu Pastor in, YPA hanmuol ah vuina a nei hi. I Synod Upa in a hing muolliem sanna tung ah i dapi leh i suunpi thu i phuong uhi. A innsung mite Pasian in hamuon in umpi tawntungta hen.

ZPWF Column

TUNNU LIMBEL PANPITE

June 2025

1. PWF New Zoveng, anntang 59kg		
2. PWF Tongdam, anntang tang	Rs.	1,320/-
3. PWF Muollun, anntang 68k		
4. PWF Lunjang, anntang 25½ kg		
5. PWF Tuining, anntang 45kg		
6. PWF M. Buongmun, anntang tang	Rs.	1,500/-
7. PWF Vaal Veng, anntang 63½ kg		
8. PWF LDCC Hiangzou, anntang 53½ kg		
9. PWF Zomi Colony , anntang 53½ leh asum in	Rs.	350/-
10. Pa Chinsuanthang, Immanuel Khopi	Rs.	500/-
11. Nu Nianiang, Moreh	Rs.	2,000/-
12. Nu Lynda, LDCC Hiangzou	Rs.	20,000/-
13. Nu Mandeiching@ Bemnu, Zomi Colony	Rs.	5,000/-
14. Upa Gouzamang, Central Church	Rs.	1,000/-
15. Nu Manneihat, Central Church	Rs.	1,000/-
16. Nu Nousuanching, Central Church	Rs.	1,000/-
17. Nu Chiinmuonkim, Central Church	Rs.	2,000/-
18. Pa Kamkhogin, Central Church	Rs.	500/-
19. Pa H. Kapneithang, Central Church	Rs.	3,000/-
20. Nu Nemkhoniang, Central Church	Rs.	1,000/-
21. Nh. Lalsiemthar, Lailam Veng	Rs.	7,000/-
22. ZPCS Muollum		
i) Mangdeiching	Rs. 2,000/-	ii)Nienngaikim Rs. 800/-
iii) Upa Lunmang & Family	Rs. 370/-	iv) David Khupsian Rs. 250/-
v) Hau Diamond	Rs. 180/-	vi) Tutsuonkhup Rs. 150/-
vii) Chiinnuomvung	Rs. 150/-	viii) Suonnieng Rs. 130/-
ix) Niengneilam	Rs. 110/-	x) Vunghaulian Rs. 100/-
xi) Mercy	Rs. 100/-	xii) Suonlien Rs. 100/-
xiii) Chiinneihoi	Rs. 90/-	xiv) Tongminthang Rs. 50/-
xv) Rev. Khamminlien	Rs. 50/-	xvi) Nienghaunuom Rs. 50/-
xvii) Min Zou	Rs. 40/-	xviii) Chingngainuom Rs. 50/-
xix) Ginmuonkap	Rs. 30/-	xx) Chingsianmuong Rs. 20/-
xxi) Vungnuomching	Rs. 20/-	xxii) Niengngaiching Rs. 20/-
xxiii) Mangsianching	Rs. 20/-	xxiv) Nuomkhanngai Rs. 20/-
xxv) Hausuonthang	Rs. 20/-	xxvi) Chiinmuonkim Rs. 20/-

xxvii) Dimhoiching	Rs.	20/-	xxviii) Nehkhantong	Rs.	10/-
xxix) Nienghauching	Rs.	10/-			
23. ZPCS Tuining					
i) Pa S. Thangchinpau	Rs.	400/-	ii) Tv. John Paul Kammalsom	Rs.	350/-
iii) Nu Hauching	Rs.	200/-	iv) Upa Ginsuankhai	Rs.	200/-
v) Nu Neizem	Rs.	170/-	vi) Pa Chinkhansuan	Rs.	100/-
vii) Tv. P. Thangminlal	Rs.	100/-	viii) Pa Lianchinthang	Rs.	50/-
ix) Nianglamkim	Rs.	50/-	x) Pa Mangminlal	Rs.	20/-

Petu zousie Mangpa'n hing guolzawl taken.
 NOTE: A dihrou kha aum le office a suhdih thei zing ahi.

Sd/- Nh. Christina Chinghatkim
 Secretary for Women's Relation
 ZPWF

.....



LAKUTPI AUDITION

Pasian mapuina toh June 13 leh 14, 2025 ni in Lakutpi Audition lawching tah in a kinei a, tuanah Audition a ding in form mi 36 in fillup ma nanleh lemtang theilou mi 4 um a, mi 32 te Audition hing pang thei uhi. Judge ding a ana kiguotten a panmun uh a hing luo thei ua, amaute Shie Sianminlian, Pu Rio Suantah, Pu Ginsuum leh Tv John M. Thangsianpiang ahi uhi. Audition honna Rev. Zamlianpau, Executive Secretary, incharge Youth in hing neisah a, tualeh audition zaw in a khahna Rev. Dr. Hangpi Manlun, Sr. Executive Secretary in hing neisah hi.

13th June in Audition Round 1 leh Round 2 a kinei a, tuanah mi 32 te lah a pat mi 20 (Top 20) telkhiet ahia, June 14 in Round 3 (Final Audition) mi 20 kidem in mi 10 (Top 10) telkhiet ahi,

Audition sung Pa Mangneu in video coverage a hing bawl sah a, tualeh Tv. Hauzalian in Photo/Lim hing kapsah hi. ZPYF Youtube channel ah zong Youtube mobile Live bawl ahi.

Tualeh Lakutpi 2026 chieng a Solo a Top 10 kidem dingte:

Elizabeth Lallhimpui	Tongdam
Rebecca Donneizou	Tuilaphai
Niangzoukim	Muollum
Niangbiehnuam	Lailamveng
Manhoiching Samte	Muollum
Ruthy Niangsuandei	Teisalang
Hatneiching	Bohlui
Chinghounuam	Behiang
Niangngailian	Muollum
Mercy Kimdeiniang	Immanuel Khopi

Lakutpi kidemna ding a mikiphal tam tah umte zieh in Pasian min in kipah thu i gen ua, tualeh Solo Top 10 teng Lakutpi min a Album bawlsah ahi ding a, tuanah Pasian min a Album sponsor bawl utte a ding a kot lienpi kihong zing ahi. Doh nuom/ thei nuom neiten Youth Co-Ordinator kung a kan thei zing ahi.

No.	PRIZE	SPONSOR TU MIN	ADDRESS
1.	SOLO		
	1 st Prize Rs. 20,000/-	Pa Thangminlian	Tangpijol
	2 nd Prize Rs. 15,000/-	Nh. Khumleidi	
	(Lakutpi 2022 1st Runner)	Behiang	
	3 rd Prize Rs. 10,000/-	Nh. Tina Chiinhoikim	LDCC Hiangzou
2.	PUPA LAA		
	1 st Prize Rs. 20,000/-	Pi Thonghoikim	Chief of Hiangtam
	2 nd Prize Rs. 15,000/-	Pu Paukhanlam,	Singngat
3.	BAND		
	1 st Prize Rs. 20,000/-	Pa Kapminlun	P Salem
	2 st . Prize Rs. 15,000/-	Nh Ruth Nuamngaiman	Immanuel Khopi
4.	ALBUM (10 Songs)		
	Rs. 15,000/-	Nh Chingdeikim	P Salem
	Rs. 15,000/-		
	Rs. 15,000/-		
	CONSOLATION		
5.	Rs. 3000/-	Lammuanlal	Behiang
	Rs. 3000/-	Thonglaljem	LDCC Hiangzou
	Rs. 3000/-	Choi Kim Zou	LDCC Hiangzou
	Rs. 3000/-	Lianhoiniang	Tangpijol
	Rs. 3000/-	Vunghaukim	Tangpijol
	Rs. 3000/-	Sir Thanglianmang	Singngat
	Rs. 3000/-	Nuamdeivung	Behiang
	Rs. 3000/-	Nh. Grace Manngaihlian	Tuining
	Rs. 3000/-	Nh. Julie Chinglamnuamniang	P. Salem
	Rs. 3000/-	Nh. Jenny Chinneilun	P. Salem
	Rs. 3000/-	Tv. MK Zou	P. Salem
	Rs. 3000/-	Anonymous (Min sel)	Central Church
	Rs. 3000/-	Tv. Henminthang	Sabual

Sd/- Tv. T Thangmuansang
Youth Co-Ordinator
8119030686

PATRON MEMBER-TE

001. Upa Gouzamang	002. Pu Hav. Khamchinkhup	003. Pu Khamzalam	004. Pu Chinzasuan
005. (L) Upa Liansuanpau	006. Pu Khamchinthang	007. Pu S. Dalthang	008. Upa Kapkhanthang
009. (L) Upa Langginmang	010. Upa S. Nangkhanlal	011. Pu S. Lamkhotang	012. Upa Dr. M. Lachinkhai
013. Upa Khamchinjam	014. (L) Upa D.K.Manlun	015. Upa Suankhanmang	016. (L) Upa Khupgou
017. (L) Upa Chinkham	018. Upa Ngulchinkham	019. (L) Rev. V. Vungzalian	020. Rev. Retd. Kamkhosoi
021. Rev. Tualzachin	022. Rev. H. Nengzaton	023. Rev. Awnkhankhup	024. Rev. Dr. Hangpi Manlun Zou
025. (L) Pu Tuanzapau	026. (L) Rev. Ginchinjam	027. (L) Rev. Khamzasuan	028. Upa T. Lamkhothawng
029. Upa Khaichinmang	030. Rev. Stephen Chinzathang	031. Pu Khupkhanmang	032. Pu Khaidohlian
033. (L) Hav. Khamzahang	034. Pi Vungzanuam	035. Pu T. Gouzadou	036. Upa Liensuonkap
037. Pi Zekkhochiin	038. Pi Hatkhanvung	039. (L) Pi Ngaihoiching	040. Pi Mankhannieng
041. Pu Goukhanmang	042. Pi Chingzalam	043. Pu S. Thianzakhai	044. Pi Kamkhanching
045. Pu Haukhanpau	046. Pu Tuallianmang	047. (L) Pu Dongkap	048. (L) Pi Chingkhanmang
049. Pi Donkhonian	050. Upa Henzakhup	051. (L) Pu Saichinpau	052. Pu Goumang
053. (L) Upa Khamkhanhang	054. Shie Laangkhanlal	055. Upa Khamkhanlun	056. Upa L. Tualkhanpau
057. Upa Jamsianmung	058. Upa Ginzadong	059. Upa Kaizathang	060. Pi Goizanuom
061. (L) Pi Thangneivah	062. Pu Khamzathang	063. Pi Donchin	064. Upa Liankhanmang
065. Pu Hauchinlun	066. Pu T. S. Lal	067. Pi Goichiin	068. (L) Pu T. Khupchinthang
069. Upa T. Kaizalam	070. Pu Paul Henkholal	071. (L) Pu Soikham	072. (L) Rev. P.C. Manga
073. Rev. Khamchinkhai	074. Rev. Zamlianpau	075. Rev. Chinzapau	076. (L) Rev. Kamkhozam
077. (L) Upa Chinpu	078. Pu Zamkhanthang	079. Pu Chinglen	080. Miss Chinhaunieng
081. Upa P. K. Sawia	082. Pu Goujakhai	083. Pi Niangkhanmang	084. (L) Evan. G.L. Joshya
085. Pi S. Chingkhanmang	086. (L) Pu Vumchinkhup	087. Upa Khaihenthang	088. Upa T. C. Pau
089. Upa Nengchinkap	090. (L) Upa Jamkhongam	091. Upa HT Manga	092. Nu Vahkhohling
093. Pu Hauliankap	094. Pi Chinnu	095. (L) Upa Ngulzakhai	096. (L) Upa T. Gougin
097. Pu Ginsuanhau	098. (L) Upa Langminthang	099. (L) Rev. David K.Samte	100. Upa T.S.K. Samte
101. Upa S.K. Khama	102. Pu Jamkhopao	103. Pu Thatthang Taithul	104. Pu Kamkhankap
105. Bhim Prasad Ghatani	106. Rev. M. Kapsuanthang	107. Nu Chingneikim	108. Rev. Khupkhansuan
109. Pi Mannuamching	110. Rev. Kaimuanlal	111. Upa Nengkhanlian	112. Nh. Deborah Zou
113. Pu T. Kuppa	114. (L) Rev. Mangsuanthang	115. (L) Pu Lamchinhou	116. Upa Pauchinlei
117. Nu Kimneihei	118. (L) Upa Kamgenpau	119. Nu Niangsuannuam	120. Nu Ngaikhanvung
121. Pu P. Sanjiv Zou	122. Upa M. Kaichinkham	123. Upa T. Sianchinpau	124. Upa Sianzahau
125. Pu L. Thenkhosoi	126. Pu Kamsuanhang	127. Upa Th. Kaikholam	128. (L) Upa Lunchinthang
129. Pu P. Tongthang Zou	130. Pu H. Nehzamang	131. Pu Thangsuankhup	132. Upa M. Kamzadou
133. Pu Jamkholian Munlao	134. Pu Sianzakhai	135. Upa Thangginsuan	136. Pu Kapminlun
137. Pi Tingzavah	138. Dr. M. Limlunthang Zou	139. Rev. Hauzalian Manlun	140. Rev. Suanglianpau
141. Rev. Ginlianmang	142. Upa L. Mangminthang Zou	143. Upa Goukhanthang	144. M. Thangsuansang Zou

LIFE MEMBER-TE

001. (L) Upa T. Khupkhenpau	002. (L) Pu M. Ginzahau	003. (L) Pu Selzapau	004. Pu L.C. Pautungnung
005. (L) Pi Khamkhannieng	006. Pi Ngainuam	007. Upa Chinsuanthang	008. Upa Shanti Kumar
009. Pu Kamkhohau	010. (L) Pu Khamkhohau	011. Upa Khamzathang	012. Upa Chinkhanthang
013. (L) Pu Tongzathang	014. Pi Chiinneilam	015. Upa Kulthang	016. H/Sm. Upa Kaichinpau
017. Pi Niangzalam	018. Upa P. Doukholun	019. Pu Kapminlian	020. Upa P. Nehgin

Undelivered

Please return to:

The Editor

KHRIŒTIAN TANGKOU

ZPCS Office, Zomi Colony

Churachandpur - 795 128

P.O. Box - 48, Manipur, India

Synod Office Telephone No. (03874) 235105

Website: zousynod.org | email: info@zousynod.org

zpcs@rediffmail.com/zousynod05@gmail.com

7a,
